


nnos.
lennis

Harriet Kowicz Valent. Joan. Fascia praesent-
lenti meritorum decore splendidiolma.

PANEG. et VITAE
Polon. Fol.
№ 722.



347.
F A S C I A

PRÆCELLENTI MERITORVM
DECORE

SPLENDIDISSIMA,

ILLVSTRISSIMO ET REVERENDISSIMO
DOMINO,

DOMINO AC PRINCIPI,

I O A N N I

MAŁACHOWSKI,

Dei, & Apostolicæ Sedis Gratiâ,

EPISCOPO CRACOVIENSI,

D V C I S E V E R I Æ,

Almæ Vniuersitatis, Generalis Studij,

Academiæ Cracouiensis

CANCELLARIO AMPLISSIMO,

Feliciter

Regni Metropolim, Cathedramq; suam
ingredienti,

A

M. VALENTINO IOANNE MAZVRKOWICZ,

Eloquentiæ Professore Tyliciano, Canonico

S. Annæ,

Promptissimo Obsequio

E X H I B I T A.

Anno, vagientis inter Fascias VERBI, 1681.

Mense Septembri.

400.
CRACOVIAE, Typis Vniuersitatis.

In Fasciam
ILLVSTRISSIMI DOMINI, ET PRINCIPIS.



BIBLIOTR. UNIV.



AGELLONICAE

Gracia vulneribus languebat scissa cruentis,
Plurimus inq. suo corpore morbus erat.
Nemo fuit, qui ferret opem, succurreret agra,
Porrigeret medicâ, pharmaca certa, manu.
Viderat hoc celso, miseratum Numen Olympo:
Fascia, sit dixit: certa medela Tibi.
Fascia sublimi, si cœli mitteris arce,
Corripient celerem, tristia cuncta fugam.

Casimirus Olszowski,
Primæ Laureæ Candidatus



Ouus iste splendor felicissimi aduentûs
Tui, & ingressus in hanc Regni Metropolim,
Sedemq; Tuam augustissimam; sicut omnium
animos in lætitiæ incredibilem attollit magnitu-
dinem; quibuscunq; venerabile os Tuum spe-
ctandum, & dignissimam plenamq; maiestate præsentiam, conspi-
ciendam impertiris: ita animos cunctorum, cohibet & coërcet;
ne laudes Tuas culpâ ingenij deterere audeant præsumantque,
ILLVSTRISSE & REVERENDISSE PRÆSVL. Quid
enim aut in Tuis Virtutibus non excellens & eximium? aut in cu-
iusquam præconijs tam sublime & elaboratum, quod par & æquale
referri rependiq; possit? Ab illo tempore, quo Rempublicam ca-
pessuisti, & ex priuatis laribus in lucem es progressus, nullus Tibi
dies sine maximis decoribus fluxit: nullus sine sedulis & sollicitis de
eius incolumitate curis, est elapsus. Sed maximi syderis instar com-
muni bono, salutare prudentissimi consilij, inuictæ laboribus tole-
rantia, radios diffundebas, pulcherrimo Virtutum omnium agmi-
ne circumcinctus, & inter sæuientium malorum tempestates con-
sistens inconcussus. Quis enim ignorat, quæ, quamue difficillima
illa Reipublicæ tempora fuerint? cùm grauissimis externis, dome-
sticisq; bellis premebatur; cùm sæuire fortuna, & cuncta miscere
cœpit: concurrentibus vndique furiali mente, externis hostibus,
ciuibusque, ad patriam oppugnandam: orbatâ breui tempore, sa-
pientissimis gubernatoribus Republicâ: immanissimâ belluâ tot
Prouinciarum Nostrarum vastitate, exultante & cruentâ: perfî-
diæ tæbe in visceribus Patriæ serpente, & in ipsa imperij vitalia
grassante, intestinaque rabie, externis furoribus sese admiscente.
Quo tempore, quis furenti fortunæ, animum non submisisset? quis
oculos à custodia Patriæ non deflexisset? quis terroribus circum-
uentam Rempublicam & obsessam non destituisset? At Tu fortu-
næ obluētatus, iuisti inter ipsa pericula, eoq; tempore Principibus
vtilissimam operam, fidissimum obsequium approbasti: cùm alios
tanti terrores, metusq; decumani, de constantia fastigio deiece-
runt. De his ergo me aliquid dicturum, alijsq; egregijs, eximijs
Virtutibus Tuis, quantæ circumstant difficultates, quanta tenuita-

248
tis suæ conscium calamum vrget magnitudo. Eadem enim Virtus, dum vult dignè differi, quam necessitate exigit artem, euertit amplitudine: neque patitur secum, nisi ad damnationem illius efflorescere. Ita fit vt miserrima euadat laudantium conditio, qui tunc maximè dedècori suo laborant, cùm se in ornamenta consumpserunt. Quippe toto illo conatu, quo magna dicere præsumunt, infra sua vota iacent, & solâ se facundiæ ruinâ, postquam magnificis verbis omnia exstruxerunt, solantur. Sed enim me has inter cogitationes, velut inter binos scopulos deprehensum, & per diuersos anxietatis mentis æstus lassatum, erigit inprimis incredibilis humanitas Tua, quod cùm laudibus omnibus dignissimus sis, patiaris Te etiam à mediocribus prædicari. Vesana illa fuit Pellæi iuuenis edictio; ne quis eum præter Apellem pingeret; aut ære duceret præter Lysippum. Ingens etiam Augusti fastus, componi aliquid de se nisi serio, & à summis ingenijs vetantis, nomenque suum commissionibus obsolescere indignantis. Obluioni obnoxia certè Virtus est, si silentio premitur: sanè si defuissent decora ingenia memorandis magnis Viris, nunquam à posteris noscerentur. Tu sicut Virtutem, ita Laudem communem putas, tanquam amplissimum ea Virtutis præmium sit, & tributum meritò magnis Viris persoluendum. Erigit etiam rei ipsius pulchritudo & honestas, quæ ipsam cogitationem nouâ perfundit voluptate. Versandum enim mihi erit, in contemplando Virtutum Tuarum splendidissimo concursu; tanquam in aliquo amœnissimo Viridario, gratissimâ florum varietate, fructuumq; latissimâ vbertate, redundante. Ita vt in hoc mihi potius elaborandum videam, vt præcipua tantum capita summis digitis carpam, quam vt plenis manibus, omnia quæ dici possunt, congeram & depromam. Neque verò à Fascia Tua censebo mihi recedendum, quæ cùm triplici niteat claritate, Nobilissimi & Antiquissimi generis Tui splendore, cœlestium Virtutum pulchritudine, multiplicium honorum præcellenti eminentiâ, lucem, ita vouemus, splendidissimam Poloniæ feret indigenti. Non improbabis, opinor, tenuis Oratoris conatum, cui quantumuis facultas non adsit; certè pròptissima suppetit voluntas Tibi placendi.

Nobilitatem non exiguo in loco ponendam esse, quoties magna Virtus laudanda venit, consentiens euincit Orbis. Quàmuis enim fortiamur genus, non eligamus; nec ante nos nostri arbitrij fuerimus: quàmuis in multis Maiorum citius defluant ceræ; quàm in

apricum & lucem gradum proferant : quàmuis inueniantur, ad quos sola trophæorum, non Virtutis Maiorum transisse videatur hereditas : quàmuis (Stoicâ Crisi) vnus omnium parens mundus sit, ad quem siue per obscuros, siue per splendidos gradus, prima cuiusq; origo perducitur : tamen non minùs audacter videtur asserendum, ad humanam omninò pertinere laudem, vti parentum decus in prole exsplendescat. Stemmata Nobilitatis insignia, imagines esse, in quibus posterorum lucet indoles, non frustra quispiam appellauit. Nam vt imagines referunt eorum lineamenta & vultus, quos varijs coloribus adumbratos repræsentant : ita Maiorum suorum heroica gesta nulli magis exprimunt ; quàm qui in Maioribus suis ideam Virtutis, & exemplum habent constitutum. Præclarissimum hoc Nobilitatis coronamentum est, quod qui generosâ stirpe orti sunt, in famam potius, quàm in amplissimas opes laborent ; neque vitam, cuius apud ignobiles tantus est amor, præferant honestati, vt penè ex illa animorum sublimitate de ignoti Viri natalibus, verissimum iudicium ferri possit. Non inconsultò igitur apud Te dicere incipiens, à clarissimo & antiquissimo Nobilissimi generis Tui splendore, sermonem meum duco : à quo Tu rerum maximarum cognitionis, beneficentiæ, fortitudinis, liberalitatis, spectatæ in multis & maximis rebus integritatis, inflammata in bonum publicum pietatis, & aliarum maximarum Virtutum igniculos, cum ipso adhuc ortu Tuo traxisti. Cuius antiquitatem ortumq; quod attinet, superat id omnem Historicorum Fastorumq; memoriam, vt pleriq; Historicorum maluerint ingenuè nescire, quàm diuinare. Fascia enim ista Tua, quam inter natia præfers decora, ab alijs ad Miecislaum Principem Poloniae deriuatur, qui cùm Dersicraius, vir amplissimus, sacris tum aquis ablueretur, eam tanquam diadema quoddam splendidissimum, è sacro fonte exeunti, gratulabundus imposuit. Alij porrò eam magnæ in Patriam Principemq; fidei, adeòq; bellicæ virtutis volunt esse monumentum, quod Viris strenuis, qui Haliciensî prælio fortem Reipublicæ nauârunt operam, gloriosus ille Regum Imperatorumq; Victor Boleslaus Criuoustus, benignissimè impertiuerat ; dum illustria illa capita, pijs hiantia vulneribus, proprijs ipse manibus, non tam obligaret, quàm coronaret. Sed siue è cruento, siue è salutari illo fonte, Armorum Tuorum gloria profluxit ; vna profectò eius genitrix Virtus est, nec nisi à nostra infirmitate, quia simul totam capere non possumus, varijs

92
nominibus est distincta. Effulsit ea postea & enituit, tanta in posteris, vt in Nałecyana Familia firmâ se perpetuâq; possessione fixisse, & in futurum collocasse, & cum posteritate ac successione totâ coniunxisse videretur. Quis obsecro tam potens fandi esset? cuius copia tam felix? tam beatissimâ redundans vbertate? quæ cum virtutes Vestras attrectauerit, non aut circumuenta numero, desperato exitu, stupeat; aut obteratur magnitudine; aut splendore obsolescens, tantum nitoris habeat; quantum ex rerum luce collegerit, quorum tanta in bello, tanta in pace decora sunt, quanta vix in vlla vnquam Familia extiterunt. Pugnent sanè aliorum pro Republica enses, reprimant hostem hastæ, excubent pro Patria leones, tueantur iustitiam secures, calcent proteruiam rebellium soleæ, protegantur ciues manibus: quidquid armorum in Equestri ordine, velut in celeberrimo emporio continetur, pro communi salute excubias vigiles agat: at armare & ornare Patriam vna ferè Fascia Vestra potest. Hinc prodire illi in prælijs primam discriminis aleam deposcere soliti, Moschouiticis, Turcicis, gloriosi trophæis, Samotulij. Hinc ortum habuere, inter implicata aut fluitantia signa, inter confertos densosq; cuneos, deuotis corporibus, prouolantes Ostrorogij. Hinc se protulere diuinis naturæ & artis decoribus, ornatissimi Zbaşcij. Hinc se fertili & felici profudere partu, æquè togâ ac sago præstantissimi Gostomscij. Hinc enituere in publicis dandis responsis, prudentes & dexterrimi Nouoduorscij. Hinc se in aspectum dedere, Præsuleâ dibaphâ radiantes Gembicij. Hinc emergere ob summam dexteritatem, in Ecclesia & Republicâ administrandâ spectatissimi, Pastoralibus infulis fulgentes Tulibouscij. Hinc provenire sæpius per hostiles acies circumferentes metum, cladem, terrorem Gosłauscij. Hinc se exhibuere, in omnem partem prouidentes, & acutum cernentes Złotopolscij. Hinc iuere magnis passibus, Marti iuxta & Palladi expediti Małachouscij Tui. Denique tanquam de liquido puroq; aëre, hinc descendere, omnibus negotijs aut pares aut superiores innumeri alij Viri, quorum & merita supra famam, & Virtus supra gloriam est. Dixerim Nałecianam Familiam instructissimum armamentarium, ex quo omne telorum genus debellandis hostilibus monstris, ac producendis boni publici defensoribus ardentissimis depromitur. Dixerim fatalem Equum, præstantissimis Viris semper foetum, mortalium saluti diuinâ dexterâ fabricatum. Dixerim nobilem officinam, quæ dedit luci publicæ æquabili

æquabili meritorum laudumq; consensu, ac firmitudine incedentes,
 ad summum gloriæ fastigium, magnos Heroas. Dixerim ditissimum
 ærarium, quod suppeditauit bellis inuictos Camillos vel Marcellos.
 Suggestit publicis Comitiorum theatris, facundos eloquio Pericles,
 vel Demosthenes. Dedit legationibus dexterrimè obeundis, solerti
 omnia acumine penetrantes Popilios. Subministrauit Senatorum
 consessui, prudentes & in consilio circumspectos Ianos. Admouit
 lateribus Regum sapientissimos Vlysses. Præbuit Ecclesijs Ascete-
 rijsq; sanctissimos Bernardos. Prospexit Episcopatibus, contra in-
 sultus Hæreticorum infractos, & verè fulmineos Athanasios. Præ-
 stitit Tribunalibus, & subsellijs iuris & æqui, summos arbitros & di-
 spensatores Aristides, vel Sulpitios. Ad extremum supremis Reipu-
 blicæ, & Sacrorum culminibus, præfecit liberrimos Ambrosios, vel
 Basilios. Martia enim gens Vestra, cum multum ex authoribus
 retinuisset suis, & maiores spiritus in origine sua hausisset, quam vt
 vel quiescere, vel latere posset; non mirum, si per ea erupit, & velut
 emicuit eius indoles, per quæ nonnisi magna semper erumpere Vir-
 tus, nonnisi maxima semper emicare gloria solet. Deinde cum mul-
 tum humanitati, & mitiori vitæ parti, mores genusq; Vestrum se tra-
 didisset; solidam prudentiam bonarum literarum studijs & admini-
 culis stabilitam, in publica commoda successu semper desiderato
 proferebat. Et quamuis velut fons irriguus in multos alueos, vitreis
 laticibus perlucidos, est propagata: quamuis velut procera arbor in
 latè patentes se explicuit ramos, sui tamen capitis naturam constan-
 tissimè retinuit, & ad hæc tempora, raro diuini Numinis fauore, reti-
 net & conseruat. An paruum hoc diuinæ in Vos benignitatis ar-
 gumentum est, quod cum aliarum Illustrium Familiarum nobiles
 ceræ, vel repentino flexu euersæ in exitum, vrgentibus fatibus deflu-
 xerint; vel solitudine, posteritatis inopiâ, penitus exaruerint: Fascia
 Vestra septuaginta propè modum non capita, sed vt nobilissimas,
 ita numerosissimas tribus felicissimè coronet; vt cum aliorum
 Stemmatum sit Viros clarissimos numerare, Fascia possit gentes
 recensere: minimèq; verendum videatur, ne vnquam deficient,
 quos tam fecundum Illustrium Virorum cinxerit diadema. Sex
 & trecentos olim Fabios, & ciues, & egregios bello milites, cum
 maximâ suâ lætitiâ, vetus numerauit Roma, omnes Patricios, omnes
 vnius generis, quorum neminem Ducem sperneret egregius quibus-
 libet temporibus Senatus: quia tamen quod audacter sibi contra

Veientes priuato sumptu, & armis, absoluendum bellum depoposce-
rant, animosius gelsere, quàm cautiùs: cæsi ad vnum omnes, tristis-
simam sui memoriam, tot funeribus orbæ patriæ reliquerunt. Quan-
tò meliùs Maiores Tui, qui cùm fortissimis operibus, periculis sæpè
ingentibus circumuentam expediuiſſent Rempubicam, neque vn-
quam furenti submiſſiſſent animos forti: eâ tamen cuncta pruden-
tiâ, vigilantia, industriâ administrabant, vt non possent se illis im-
putare successus; neq; vnquam vel se, vel patriam in casum dede-
runt coniecerintq;.

Vide ILLUSTRISſIME DOMINE, quæ Te lux circumſtet,
quantis circumfluas decoribus, per quantas domesticarum laudum
vias, per quàm laureatos postes, & ingentium animarum simulacris
obſepta atria, ad ſummum iſtud decus proceſſeris. Cæterùm Tu
quæ Tua, ſiue modestia, ſiue prudentia eſt, non his ſolis ornamentis
eſt innixus; ſed Te progeniem magnorum Virorum, non adulationi-
bus fabuloſis; ſed æquatis Virtutibus, & felici Maiorum Tuorum
imitatione ſemper ſtudebas comprobare. Vidimus permultos hu-
iuſcemodi, qui meminerunt præclari ſanguinis, & turpiter defece-
runt: qui quàm acceperunt beneficio fortunæ claritudinem, inertia
ſuâ obſcurarunt: qui præclariffimum à Maioribus acceptum gloriæ
patrimonium, prodigi nimis abliguriuerunt: qui ignauis animalibus
nō abſimiles, quibus ſi cibum ſuggeras, iacent torpentq;; præterita,
futura, iſtantia, pari obliuione dimiſerunt. Nulla cultior eruditio ad
domandam feritatem, & inſcitiam adhibita. Nihil probati ſeminis in-
iectum cum literis, vt bonæ frugis ſpem natura faceret. Vidimus iu-
uentutem auream, & potiſſimâ vitæ partem, in domesticæ vitæ late-
bris exactam, & quaſi tumultatam. Vidimus per remiſſiones vni-
uerſam ætatem ductam; & quaſi nihil calamitoſius eſſet, quàm af-
ſiduò libris impalleſcere, lucernarum fuliginem bibere, tomno lan-
guidos & otio, antequam è vita exiſſent, miſerrimè contabuſſe.
Interea magno, & fertili prouentu creuere vitia; & veluti in ſolo
non ſubactò, optima quæq; ſiue naturæ, ſiue fortunæ ſemina: quia
neglecta, peſſimâ cōſuetudine, in foediſſimos degenerarunt abortus.
Neq; enim tam præcipiti curſu deſeruntur Virtutes, quàm velox ad
extremam morum corruptelam fit tranſcurſus, qui poſtea nullâ
diligentiâ, nullis laboribus poteſt inhiberi. Tibi ILLUSTRISſIME
DOMINE, Nobilitas lux fuit in adamantem incidens, maiorem
reflectens claritatem, quàm recepit. Fuit trophæum Miltiadis, al-
terum

terum Te Themistoclem, ingentibus stimulis agitans, vt contra difficultates omnes, in summa Virtutis culmina eluctareris. Fuit maximum incitamentum, vt in patrium cœlum sidera reduceres, quibus præterita tempora colluxerunt. Itaq; nihil prius, nihil potius habuisti; quam vt facilem adhuc & tractabilem animum ad meliora conuerteres, & inimicas vitij artes edisceres. Incredibile dictu est, quantus Te ab initio statim, earum ardor cepit. Nullâ discendi Magistros adolescens difficultate percipiendi affligebas. Nihil offerebant Sapientiæ Doctores, quod celeritate non reciperes, aut sagacitate non præuenires. Siue artem eloquentiæ præcepissent, statim in cultu, leni tractu fluentem orationem, & Comico sale, ac lepore eruditionis conspersam exhibebas. Siue veteres Annales, interpretatione commendassent: ita animi Tui sensum, in eorum memoriam componebas, vt quantum ad cognitionem rerum pertinet, etiam præteritis sæculis vixisse videreris. Siue ciuilem sapientiam ad modum vitæ instituendæ proposuissent, satis percipiebas feliciter, optimè gnarus, si quis ad officium boni ciuis explendum, doctrinarum præsidium non attulerit, totam eius ætatem ab imperitia occupandam. Eò conatus tendebat omnis, eò cogitationes curæq; referebantur, vt per spatia illa Musarum, mille laboribus congestas diuitias, aliquando in publici boni thesaurum inferre posses. Noctes quin etiam consecratæ lectionibus serijs, & somnus cum valetudine computatus, corpusq; puluinaribus dereptum, affixi pluteo cadentes oculi, & in opere tamen detenti, quasi Tibi nihil dulcius esset, quam cum eruditis mortuis versari.

Hâc ratione adolescentiâ in magnis literarum meditamentis consumptâ, & ab ijs ad struendam fortunam ope conquistâ, subactum illis politumq; animum, rebus agendis commodasti; & vini ingenij præclaram, quâ tum pollebas plurimum, ad maiora Regni negotia contulisti. Quid hîc dicam:

A puero tenerisq; etiam fulgebat in annis

Fortuna maioris honos.

Vt Phidiæ simulachrum semel inspectus statim probatus es. Non per latentes moras expectandum fuit, ut aliquando magnis in Republica Viris sedulitatem Tuam commendares. Quæ sunt alijs fastigia, Tibi fuere rudimenta; magnarumq; rerum, illicò capacem Te ostendisti; quia festinatâ, viuידâ dexteritate, etiam minores transigebas. Non promittebas Te futurum Magnum, sed effor-

127
mabas; neque in Te erupturæ Virtutis tumens germen, & flos præ-
cursor bonæ indolis, lætior quàm yberior apparebat: sed iam fa-
cta grandifera, maximorum fructuum, matura perceptio. Quam
in Te, eo etiam copiosiori amoris argumento, boni cuncti susce-
perant; quia ad illius inaccessæ lucis radios, cuius Sol & Luna tenues
sunt vimbæ, faustis omnibus oculos attollebas. Vt enim limpidi-
sima aqua, cum in eam incurreret, & quasi se immiscuerit cœleste
lumen, magis etiam illimis & perspicua conspicitur: ita eximæ na-
turæ dotes splendidiores nitidioresq; apparent, cum primæ illi luci
per cuncta diffusæ, pulcherrimo nexu coniunguntur. Hærebat hoc
in Sapientia Tua ILLVSTRISSE PRÆSVL, ideòq; quàm citò
ad Rempublicam accessisti, in amplissimum Sacerdotum Ordinem
coöptari voluisti. Pulchrum, enimverò, ita curare publica, vt Di-
uina semper antecedant. Sicut enim acus nautica, sympathiâ quâ-
dam, perpetuò conuertitur, & in motu est, donec se firmet ad lucem
stellæ polaris, circa quam rapidissimâ vertigine, cœlestes voluuntur
orbes: ita certè Viris Magnis quiescere non licet, donec maiori
studio, & sinceriori pietatis cultu, venerentur, increatam illam
lucem, in qua est vera requies, & cuius auspicijs, perpetuâ quâdam
agitatione, rerum viget vniuersitas. Rapiebaris Tu ad hoc lumen;
exurgebas ad illius Supremi Numinis venerationem, ex quo oriun-
tur omnia, & in quod redeunt omnia, lege certâ, diuersis licet iti-
neribus. Sunt in ore, sunt in sermone omnium, expressa Tuæ pie-
tatis indicia; sunt manifesta testimonia, cum Te quasi à mortali
contagione secretum, purum, penitusq; sincerum, ubiq; præstabas;
cum Te singulis propè diebus, pijs aris supplicantem admouebas
Sacerdotem: quæ nunc consuetudo, constanti Tibi in religionem
cultu versa. Ijs religionis ac diuini cultûs, amorisq; euentibus si-
gnis, totius Regni imitationem excitasti, & expleuisti admirationem,
vt cum cæteras Virtutes Tuas omnes amarent, & prædicarent:
hanc vnâ suspicerent & venerarentur. Neq; multum postea flu-
xit temporis, cum eam in Te Virtutem, diuina benignitas, nouis
præmiorum accessionibus est profecuta. Antiquissimus olim Philo-
sophorum Hermes, mensuram hominis appellauit pietatem. Quia,
vt ipse dixit, id est homo cui adhæret. Pietate autem diuinitati ad-
hæremus, & ligamur. Rectissimè ergo dignitatem humanam, pietas
metitur. Quam verè, quàm conuenienter hoc de Tua pietate di-
cere possumus; quem breui spectauit Cracouiensis Dioecesis am-
plissimo

plissimo Canonicorum Cracouiensium Collegio, tanquam pretiosissimam gemmam, aureo annulo insertum, illatumq; . Audire erat iam tunc, properantia bonorum omnium studia, in destinandis Tibi, in eadem Diœcesi supremis honoribus, gradumq; tantum eam dignitatem fore, ad supremum culmen obtinendum. Quæ Tu expleuisti cumulatissimè, quotidie contendens Tecum ipso: totus animum in omnes curas diuidens, vt Respublica nutans, Tuis laboribus, consilijsq; (quantum vnius hominis operâ effici potest) fulciretur. Erat tunc Respublica Nostra, triste rerum humanarum spectaculum, & vel ipsis hostibus miserabile ac lugendum. Erat ad instar alicuius Penthei vel Deiphobi, quem --- *Lacerum crudeliter ora*

Ora manusq; ambas, populataq; tempora raptis

Auribus, & truncas inhonesto vulnere nares ---

ostentantem, Princeps describit Poëtarum. Cuncta in ea ob tot annorum non feralia bella, sed horribiles lanienas, rapinis vasta, incendijs torrida, ruinis confecta. Prorutæ domus, eueriæ fortunæ, profuga Nobilitas, omnis humanæ opis indiga. Raptati liberi, nurus nefanda passæ, matronæ superbissimorum hostium pedibus aduolutæ. Decolores sanguine fluuij, cæsi vel disiecti exercitus, tonitrua tormentorum è proximo aures impellentia. Incensæ aræ, fumantes oppidorum reliquiæ, deserta vsque ad mare patentia, Superis, populisq; deletis. Omnia primò domestici, postea peregrini latronis spolum, ac præda. Exigua tamen pars malorum visa, præut, quo pacto ipsi ciues in hanc Altricem suam læuierunt. Vna natio, longo tumultu, in seipsam, in partes atq; factiones diuisa: partesq; in bella togatæ; publici boni obtentu, (quod seditionum omnium fatale velamen est) ex Regiæ potestatis iniuriâ incrementa captans: à furentibus toties rupta & discissa Comitia. Armata in ciues militia. Nullis profusis largitionibus exsaturata cupiditas. Hostes in ipsa viscera, ac vitalia Patriæ introducti. Excussum vbique obsequium. Vbiq; turbamenta Reipublicæ, atq; exitia. Deserta & pulsa Maestas, & cupidine libertatis inductum, teterrimum seruitium. Ventum fuisset ad extrema: si non in Serenissimum, & verè inuictum CASIMIRVM, dira tempestas Reipublicæ Nostræ, supremum ferens exitium incidisset. Qui tot fortunæ sæuientis iniurijs, nequaquam fractus, ac domitus, periculis alacrior, primus Regale caput in discrimina ferens, primus maioris semper discriminis aleam deposcens; magnæq; animæ, propè ad reprehensionem prodigus, quàmuis præ-

lijſ ambiguis, bello tamen inuictus, iniecit Superis (ſi ita fas loqui)
verecundiam, tantam fortitudinem, tam generoſum pectus, in ſu-
premo virium conatu deſtituendi. De bellica eius Virtute loquor,
quam etiam domi inter ciues, publicis malis, ad occaſionem priuati,
vel odij, vel commodi abutentes, ſatis abundè prompſit, & approba-
uit. Cùm enim (vt alia eius in hanc Rempub: maiore obſeruantia
argumento dicenda ſileam merita) pro ſua incredibili quâ pollebat
ſapientiâ, tot ſibi intelligeret non defuturas manus, quot bonos mi-
niſtros; vt benè ac feliciter regeret omnia: tot aures & oculos;
quot domeſticos & familiares; vt ſciret omnia: tot vigilantiffimos
cuſtodes Regalis capitis, Regniq; ſui; quot fidos, nec obſcura pru-
dentis animi, ad magna quæq; nati, & inſtituti ſpecimina oſtenden-
tes Conſiliarios; vt amaretur ab omnibus: in Te ornando ad ma-
ioraq; producendo, ita ſuum inflexit iudicium, vt ſingularem Tuam
admiratus prudentiam, robur animi, conſtantiam, poſuerit Te in
loco ſublimiori, ex quo pluribus bonitas, magnitudoq; animi Tui
eluceret. Fecit Te, inclinatiſſimâ voluntate ſuum Referendarium,
vt cùm ipſe iuris & æqui, ſummus arbiter, Themidis tripodes qua-
terer, & populorum fata partiretur: Tu ea, non vt olim Apollinis
Delphici Pythia, implexis ambagibus eluderet, atq; torqueret; ſed
apertis reſponſis luſtraret, omniaq; caligine ſolutâ, in clara luce
collocaret. Quæ ingenij vis? quæ tanta facultas? hæc mente aſſe-
qui, ne dum Oratione complecti valeat? quæ Tu in laborioſo iſto
munere, cum omnium conſenſu, & approbatione præſtitisti. Ad
Te veniebat oppreſſio miſerorum: Tu lamenta viduarum excipie-
bas: Tu calamitoſorum manantes detergebas lacrymas: Te pa-
tronum oppreſſa innocentia ſibi adſciſcebat: Te iuſtitia defenſo-
rem ſuum contra improbitatis potentiam depoſcebat: neq; quid-
quam Tibi fuit iucundius, quàm humaniſſimi vultûs inclinatione,
ad omnium Te miſerias, preceſq; demittere, quaſi omnes ad aliquid
requirendum à Te inuitaret. Tam præſtans Virtutum Tuarum
ſplendor, cùm in omnium oculis effulſiſſet, omnium in Te ſtudia,
expectationem, & fauorem excitauit. Et iure quidem merito. Ni-
hil enim tam dulciter animis humanis illabitur, nihil tam cupienti-
bus videtur oculis, nihil tam opimâ ſpe bonos recreat; quàm quo-
ties nullum laborem, nullamq; ſollicitudinem, pro curâ ſalutis alienæ
conſeruandâ, defugiunt Magiſtratus. Iudicum certè rari ſunt, qui-
bus non placeat pro ſeueritate, acerbitas; pro rigore, truculentia;
pro

pro iusto metu, vehemens nec opinatus terror; pro descriptis sanctisq; legibus, sua cuiq; propria voluntas. Difficillimum est ita Iudices agere, vt semper in officio suo id præstent, quod examen in trutina. vt illis semper constet æquitas, cuius balances in æquilibrio consistunt, qui non maiorem reis incutiant metum; quam spem; qui non potius eos callidis deprimant artibus, quam erigant subleuentq;. Sicut non vbi auditur, tonitruum periculum fit; sed longius: quia obliquo motu, præcipitat excussum fulmen: & in distantia sæuit: ita qui ex officio, tonanti legi viciniore sunt, maiori securitate indulgent sibi; & aut periculosè alios damnant, aut turpiter absolunt; quàm ij, qui procul à Iudicum subsellijs, præsumunt ius irritare. Tu semper habebas in consilio legem, æquitatem, fidem; odium, inuidiam, metum, cupiditates omnes amouebas: magni æstimabas conscientiam, quæ à nobis diuelli non potest, quæ cum est optimorum consiliorum, atq; factorum testis, in omni vitâ, sine villo metu, & cum omni honestate, cœtus humani frequentantur. Hac moderatione efficiebas, vt cum aliquando restrictus, & peruersus esse cogereris, (acerbitas enim puniti maleficijs, bene cautèq; viuendi disciplina est) nullius tamen prouocaueris questus, nullius complorationem eliceris, nullius mentem per intestini doloris fluctus fatigaueris; sed etiam tum cum timebaris, studia cunctorum in Te vertebas, & beneuolentiam prouocabas.

Iam quid ego memorem, in quam amplum gloriæ campum, Tuas dotes protuleris, Legatus sæpius SS. Maiestatum, ad confessus Palatinatum, & earum Tecum dignitatem, per publica illa theatra frequentius circumferens. Diuino præditus ingenio, sit oportet, cui tanta negotia curæ: quiq; in illo æstu Comitiorum, in quo frequentissima sicut fluctuum, sic voluntatum solet esse permutatio, cor, mentem Principis, ciuiumq; suorum teneat: in tantâ præsertim gentis nostræ libertate, cuius vitia nonnullos acrius impellunt, quàm cura; qui cum priuatim degeneres sint, in publicum exitiosi, nihil spei, nisi per discordias habent; & vbi semel turbare, & impellere Rempublicam cæperunt, quidquid vîpiam malorum est, permiscunt; & ad factionum, veluti morborum incrementa, conferunt, conuertuntq;. Moderari tales animos, regere sensus; attrahere, rapere recalcitrantes; conciliare infestos, cohibere tumultuantes, vim, audaciam, impetu rationis frangere: ita deniq; effingere omnia, vt cumulatè cunctorum desideria satientur; est sum-

mæ prudentiæ, summæ dexteritatis, summæ & incredibilis in dicendo facultatis. Tu in officio tam arduo ita Te gessisti circumspectum, inter illas tot negotiorum decumanas procellas, validis consilij incumbens remis, obliquabas publici boni sinus, in ventos popularis auræ, licet aduersos; vt omnes incredibilem in modum, Tuam deprædicarent æquitatem, facundiam, dexteritatem. Adiungebas quippè lenitatem eloquentiæ, prudentiam comitati, grauitatem humanitati, suauitatem maturitati: & cum veritatem sine offensione, grauitatem morum sine supercilio, leporem orationis sine leuitate, concordiam sine simulatione, incredibili dicendi dulcedine probares, ac temperares: meritò etiam sapius tanquam Maiæ nepos, cœlo delapius, paciferas oleas protendens, discordes animos, & non benè cohærentes sibi ciuiles mentes, vultu simul, ac auditu venerabilis, mitigabas. Feliciori in publicum successu, quàm Cæsaris Fasciâ Tuâ: illa enim communem patriæ gemitum exciuit; Tuam nunquam suspexit Polonia, sine singulari suâ voluptate.

His tantis, tamq; præstantibus actionibus Tuis, nimium quàm spectatis & commendatis, quibus quasi structis gradibus, ad vnâ eamq; immortalem, veri decoris laudem procedebas, maiora in patriâ longè debebantur, & ampliora præmia, ne sola illis esset ex conscientia merces. Oportuit etiam tam sublimem animum, & admirabilem honestatis cupiditatem, tot decorum capacem, non profanis tantum patriæ curis exerceri; sed sanctioribus etiam Ecclesiasticis negotijs admoueri, ne quid eius amplitudini deesse videretur. Egit hoc perlibenter Serenissimus Rex Noster IOANNES III. feliciter nobis imperans, cuius vtinam vitæ prospera, quàm longissimè porrigantur, vt diu sub tanto Capite Respublica incredibili commodorum vbertate frui, totq; lacerata malis, confirmari erigiq; possit. Hic inquam Optimus Principum, lynceis mentis oculis merita, & naturæ eximium, atq; præstantem habitum, non dissimulanter perspicies Tuum: altâq; meditatione perpendens, illam Tuam prudentiam, illum boni publici amorem, illud continuum Principibus suis, quasi debitum gratificandi studium, affectum suum, beneuolentiâ explicauit, Tibiq; Regni Vicecancelleriatum, tanquam nouam gloriæ possessionem attribuit; simulque Lituo & Tiarâ Episcopatus Culmensis decorauit. O verè præclarissimum Tanti Regis de Tua singulari Virtute iudicium! & mille linguis, milleq; præconijs in omne æuum transmittendum! Olim

Timo-

Timoleonti Corinthio, cū in Siciliam ad crudelem Tyrannum suā Sede pellendum perrecturus, Apollini Delphico, sacra faceret, votaꝫ nuncuparet, ē donis suspensis Fascia in caput decidens, coronæ illud, aut diadematis ritu, ita circumcinxit, itaꝫ corollis suis intexuit, vt prorsus à Deo coronari videretur. An non fortunatior Fascia Tua, quæ Tibi Serenissimi quidem Regis benignitate; sed diuinæ tamen gratiæ liberali dispensatione, eo tempore cessit in coronam; cū ad vtramꝫ, altius prouectus es dignitatem, & in duplici Ecclesiæ, & Reipublicæ speculâ constitutus, ē quā Tuarum Virtutum fulgore, ampliùs copiosiusꝫ vtramꝫ illustrares. Quantum porrò istud est, quantisꝫ in laudibus ponendum, ad supremos in Ecclesiâ & Republicâ honores ita peruenire, vt non alijs vtaris suffragatoribus, quàm laboribus tuis, meritis tuis. Magnum illud profectò est, ab inclyti generis stirpe, ad hominum commendationem profluxisse! maius in lucem statim felicem venire, & auitæ Maiorum dignitati, rerum præclarè gestarum gloriâ, inusitatum splendorem infundere: at longè maximum, non populari aurâ circumferri, non domesticarum venditare fulgorem imaginum; sed sapientissimi Regis studium, fauorē, perspectissimam emereri beneuolentiam, & in culmina honorum, gloriôsè euasisse. Itaq; nulla pluuia, tam maturo tempore, sitientem terram irrigat: nulla lux, hærenti, & spissis circumfuso tenebris viatori, tam grata exoritur: nulla aqua, præ siti morientibus, tam opportuna ex asperis erumpit rupibus: nulla tranquillitas, tam tempestiua, inter spumantes undarum moles, & fluctus decumanos, tam iucunda trepidos recreat nautas: nulla salus post diuturnos, & desperatos morbos, tam dulcis, tam amabilis, ægro torpenti redit; vt Tu eo tempore cunctorum erexisti animos, tantâ dignitatis accessione: & optatis solatijs mœrentium formidinem, pauoremꝫ deterfisti. Præfulatûs Tui denunciatio prima, maximam in cunctorum animis diffuderat lucem, & multiformes lætantium reddidit status. Clamores insolitos profundeabat, in Nobilitate, laudandi effusa libertas. Tripudiabat præ nimîâ hilaritate, dicati Deo Cleri promptitudo. Illa gaudiorum impatientia, illa exultatio corporum, nescientibus propè hominibus alijs excitabatur. Vbi verò Te iam in suis conspexerunt, consalutaruntꝫ sedibus, vni Tibi, quasi benigno cuidam, auspicatorꝫ Sideri, oculos, vultusꝫ aduerterunt. Te vnum, votis omnibus, festoꝫ appreciationum clamore dedicabant: Vnus eras, à quo &

D

omnia

omnia, omnes præstolarentur bona, & soli, comprecarentur vni-
uersa. Et fanè quàm maximo fauore illi, suam, apud animum Tuum,
magna omnia parantem, beneuolentiam occupârunt. Cumulatissi-
mâ enim, votis eorum respondisti redhibitione: cùm omnibus Te,
æquo paterni amoris iure deuinctum sentires: iisdemq; præsentis
Tui copiam, ac felicitatem, terminis definiuisti, quibus latissimè
procurrens, Episcopatus Tui Dioecesis claudebatur. Nihil despe-
xisti arduum, neglexisti longinquum, deseruisti inaccessum. Fle-
ctendi erant, ad ouile CHRISTI, dissidentes incolæ, custodiendæ
à crudeli luporum laniatione oues Domini; has Tu summâ vigilan-
tiâ, summâ pietate custodiuisti: illos partim consilijs optimis, par-
tim probatissimis vitæ exemplis flexisti, & à temeritate, ad vitæ pro-
bitatem, à foedissimis erroribus, ad veræ religionis non fallens iter
deduxisti. Multorum audaciam, auctoritate compressisti, multo-
rum tumorem benignitate, fucum candore, vecordiam veritate
superasti. Idq; cùm non Rhadamantheo rigidus supercilio, Tibi
subiectis impenderes; sed placidos, summâq; benignitate serenatos,
quâquauersus diffunderes aspectus: nec tam omnes potestati Tuæ
adstrictos; quàm potius fidei, beneuolentiæq; Tuæ adoptatos, in
CHRISTO filios inspectares. Beatissimum se prædicabat, Clerus
illius Dioecesis, tali Pastore, in quo cùm vis abesset, & nimia seueri-
tas: incredibilis tamen comitas, prudentia, facilitas, cunctos ad
solidum virtutis exercitium permouebat, alliciebat, pertrahabat.

Hæc Te in Episcopatus arduo munere, examussim omnia, ad
publicum commodum facientem, præstantemq; & celerrimis pas-
sibus, ad maiora virtutum decora progredientem; etiam non minùs
Vicecancellarij sublime munus, vastis primisq; Regni curis, distine-
bat. Est verò hoc tam implexum, tantum laboris, tantumq; sudo-
ris requirens, tantum operis exigens officium; quantum fortassis
nullus in Polonia honor, nulla dignitas requirit, exigitq;. Magna
hic in rebus feliciter gerendis dexteritas expetitur; desideratur nota
& perspecta prudentia; incorrupta vllis bonorum illecebris mens
postulatur; solers cura, fides, diligentia, quasi perpetuæ huius ho-
noris comites deposcuntur. Nam si mente, vt omnia imperia, sic
nostrum florentissimum antea, nunc heu nimis attonsum & minu-
tum, libratur, regiturq;? Mentem Principum, grauissimo eloquio
enunciant, & instruunt prudentiam Cancellarij. Si fata, fortunasq;,
sibi subditis populis, largâ manu, dispensant Principes? dispensant
per

355
per Cancellarios. Si sanciendis cum vicinâ hostilitate foederibus, communem statum munire, firmareq; volunt? foederum administri sunt Cancellarij. Si omnes dominationes, habent sua arcana peculiaris, quibus innituntur? hæc vix alibi deponuntur, quàm apud Cancellarios. Si omnium imperiorum Regina, custosq; certissima, & conseruatricis est iustitia? interpretes eius, Antistites sunt Cancellarij. Si condendæ salutare præsentibus rebus leges, nouis præmiorum, honorumq; insignibus exornandi boni? exigendæ ab improbis & consccleratis hominibus poenæ; pro rerum & naturarum inclinatione, diuersi, diuersorum animi, variè, nec vnâ ratione tractandi? non aliorum est istud quasi debitum munus, quàm Cancellariorum. Quid multa? promptuaria boni publici, Atlantes negotiorum, afflictæ Virtutis perfugia, aræ hominum indigentium, corda, oculi, ora Principum, sunt Cancellarij. Istis Antipatris peruigilantibus, securè, quietè, dulci sopiuntur, nostri Alexandri. Istis salutem communem, statumq; procurantibus, nullasq; pro alienâ incolumitate conseruandâ, amplificandâq; fugientibus dimicationes, oppressi potentiorum iniuriâ releuantur; legum integritas, intacta inuolutaq; manet; suum à quouis officium, sua dignitas, absq; onere sustinetur. Istis ad humana commoda sedulò intentis, admiranda omnium actionum præcellentia, ad publici decoris venustatem efflorescit. Nulla æquitatem peruertit improbitas; nulla consilium vincit temeritas; nullus rationem deijcit furor; nulla fides, pudicitiam, sanctimoniam, perfidia, impudentia, impietas superat, profligat, & pessundat. Quantis ergo oportet instructum esse præsidis? quàm excelso, generoso, heroico spiritu? quàm igneâ, exporrectâ, intrepidâ indole? quàm capaci magnarum rerum pectore? quàm indefessâ celestium orbium cursûs imitatâ agendi facilitate? quâ fide, candore, boni publici amore, masculo libertatis vsu, timoris ignarâ, fraudum experte fide, constantiâ, tolerantia; præterea modestiâ, humanitate, in omnes incredibili quâdam, & paternâ viscerum profusione; cæteris summis & absolutissimis, siue naturæ, siue prudentiæ dotibus, & quis est, qui non perspiciat manifestè? Superasti vel saltim adæquasti hæc, & alia, tantæ dignitati debita præsidia; animiq; altius supra humana asurgentis heroico vigore, talem Te in eo munere ostendisti, qualem Te sibi, pridem suis in cogitationibus effingebant. Habuit in Te Serenissimus Rex, ingenuum & prudens pectus, in quod curas

102 suas effunderet, cuius peritiæ tutò arcana committeret, cui difficillima negotia, ex vſu & dignitate publica tractanda concrederet, in quem onera ſua grauiffima reclinaret. Habuerunt ſiue proſpera, ſiue aduerſa Regni noſtri momenta, ſucceſſusq; , prudentiffima conſilia, quibus in omnem Regni vſum inſtructiffimus, præſentia acriter, ventura tempeſtiuè, ambigua certò, captiola feliciter prævidebas: & tanquam prudentiffimus medicus, non minùs fidam, quam ſcitam manum, agræ iſti Matri molliffimè ſupponebas. Habuerunt afflicti contra varios caſus, quaſi portum benignitatis; tantam in ſummo culmine facilitatem, tam iucundam ſermonis affabilitatem, tantâ comitatis non obſcurâ ſignificatione, conditam, & obuiam, acceſſûs fiduciam; vt tenerrimi affectus impetu, vltra matrem, indulgentiffimus videreris. Quæ omnia tantò gratiora fuerunt, quantò aliorum, rarus ſermo, luctantia verba, duræ fores, contractæ frontis nubes, & vltra conſuetudinem gentis, triſtitia, & ſenium, moleſtiùs ſentiebantur. Quid multa congero? nulla fuit laus in Republica illuſtris, cuius Tu non princeps: nullum in Eccleſia inſigne meritum, cuius Tu non auctor, aut ſocius: nullus vir magnarum rerum ſtudioſus, & appetens, cui Tu non ſimilis: nulla grauior conuentio, cui Tu non præſens. Senſerunt Te optima ingenia, & futura Eccleſiæ, Rei; publicæ fulcra, beatiffimâ ſuffragatione, & pertinaci ſibi fauore patrocinantem. Expertæ indigentum neceſſitates, nouum Triptoleum; beneficentiæ ſemina longè, latèque ſpargentem. Coluerunt amicitia aliorum, recliuim ſibi in Te, beneuolentiæ ſacrarium, quod poſtea nulla tempora, nulli affectus obſerarent. Stupuerunt noti, ignoti; , nullo fortunæ augmento, tumefcentem moderationem. Curæ, ſolicitudinesq; ambigentium, ſæpiùs ad Tuum pectus, velut ad certiffimum oraculum confugerunt, à quo vtiliffima ſibi reſponſa depromebant. Viderunt cuncti ſuauiſſimos mores, ad omnem humanitatem mitigatos, neq; vilius humilitatem deſpicienti morâ vexatam; verbo dicam, tota vita, omnium Virtutum facibus, quaſi ſplendidiſſimum aliquod delubrum, præfulgebat. Illimis ſcilicet, & niueus Falciæ Tuæ candor, cum omnibus niteret decoribus, vel minimas maculas, næuosque, non modò liberioris, & in licentiam pronioris vitæ; ſed etiam ceſſantis à publicis functionibus quietis reſpuebat. Pergerem diutiùs, indulgere Orationi, per eximia Virtutum Tuarum ornamenta, diffluere geſtienti, niſi me iam ſupremus iſte, in Republica honor,
Epilco-

Episcopatus Cracouiensis, vnus nobis instar omnium suffecturus, ad se raperet; cæteraq; omnia relinquere hortaretur. Namq; si tanta sunt Tua decora, quæ Tibi ad amplissimos in Republica honores, viam aperuerunt. Si Tuas præclarissimas Virtutes, quibus mirificè splendescebas, omnia loca quæ triuisti, dignitates quas gessisti, negotia quæ perfecisti loquentur; Tuumq; tam spectatum exemplum, tenaci sæculorum memoria traditum, in ipsa astra, sublimè pennata fama feret: si vniuersa Fastorum memoria, & læta posteritatis gratitudo, nunquam in Tuis celebrandis, susceptis pro Republicâ, non intermissis laboribus, obmutescet: si Tuarum actionum simulacra, felici sui contemplatione, omnes præsentēs, futurosq; annos, gloriæ Tuæ vectigales reddent: quanta debet esse nostra lætitia? quibus nos gaudijs incedere par est? quàm exundanti hilaritati, mentes, animosq; laxare deçet? in Fasciâ Tuâ abundè recepturis, quidquid à nobis in alijs inuidiâ factorum est amissum. Cernere mihi iam videor, fugere à conspectu Tuo, depresso collo, subiectis ceruicibus, subactō vultu, trepidam hæresim & pauentem. Video corruptos, contaminatosq; mores, quâ datâ porta, ante auditam sententiam, in exilium properare. Video agmina vitiorum, vno simul loro deuincta, expelli flagello virtutum. Video tractum sonanti compede liuorem ringi, fremere audaciam sine telo, iacere arrogantiam sine supercilio, mordere inuidiam sine dente, bacchari impietatem sine voce, moestam sine viribus improbitatem, agmen claudere. Timete, timete flagitia vbi vbi estis? plenum animi, plenum prudentiæ, plenum inflammatae charitatis habemus Antistitem. Qui Plausus interea! quæ vota virtutum! hinc iustitia; illinc fortitudo: hinc temperantia; illinc prudentia, ex magnifico placidoq; fulgent. Præter has frugalitas, continentia, tolerantia, liberalitas, comitasq; splendorem suum affundunt; tum prouidentia, tum elegantia, & ex istis magnanimitas eminentissima, quantum DEVS bone ponderis, grauitatisque, addunt. Prodeunt omnes, proferuntq; se in conspectum, istâ vultûs benignitate, istâ animi magnitudine, istâ oculorum serenitate euocata. Pantarbam gemmam sigillarem, in flumen coniectam, septuaginta septem gemmas, & lapides pretiosos, similiter in flumen coniectos, sibi mutuò connexos traxisse; quasi vim, primo, ad trahendum secundum transfudisset, secundo ad tertium; narrat Græciæ non infimus Scriptor. Efficacior nobis Tua Fascia erit, quæ nobis omnia

honestatis coronamenta, quasi aureâ deuinctâ catenâ, Tecum ducit. Ingredere felicissimè hâc insignis & præfulgens tiarâ: hanc quæ cum magnâ, & incredibili animi Tui voluptate, propè suis conuulsa sedibus, venientem excipit Regni Metropolim. Illicescenouum Sydus Arctois gentibus, hospitalemq; aduentûs Tui gratiam, redituræ felicitatis prænuntiam, nobis omnibus impertire. Sacra Tua præsentia, grandi prosperorû imagine, spes nostras reficit, quod nobis futura sit pro igne nautico, pro iride, pro Alcionum nidulo, quæ mari tranquillitatem, cœlo serenitatem præmonstrant. Abibit tandem, & recedet effrons ferocientis sortis malignitas, quæ nobis nuper lapsis annis, tot pericula, tot ruinas, tot funera densa struxit. Aspice hanc nobilissimam Dioecesis Tuæ portionem, sacratum DEO Clerum, vt velut examina apum, circa suum Regem, circa Te glomerantur, vt illorum singuli Te præire, Tuo lateri adherere, Te comitari, maximæ sibi laudi ducunt; vt vocibus, vultibus, & gratâ admurmuratione, in Tua consentiunt encomia, Talemq; sibi cœlitûs Antistitem, difficillimis temporibus oblatum, in impatienti hilaritate, satis intelligere nequeunt, nisi attoniti. Refer oculos, ad lætissimum omnium ordinum, ætatum, hominum confluxum; vt bonis ominibus prosequuntur aduentantem, vt per ardentes preces, supplicationesq;, clementiam Diuinam sollicitant, ne has prosperrimas successuum Tuorum vices, breuior ætas interuertat; sed potius prolixa multiplicet, & eorum magnitudini, accedat diuturnitas. Intuere etiam infimæ plebis, ingentem turbam, quam expectatus, & istis desideratus, in Urbem venis. Vt oculos inusitato spectaculo imples. Te paruuli noscere cupiunt, ostentant iuuenes, mirantur senes, ægri quoque ad conspectum Tuum, neglecto medentium imperio, quasi ad salutem, sanitatemq; suam prorepunt. Opplentur viæ alacri, hinc & inde populo, vbique par gaudium, parq; clamor, fausta Tibi omnia promittentium. Omnium quippe animi, non falsi vates, certâ præsentiant coniecturâ, præfagiunt anticipatione, Te fore formam iustitiæ, sanctimonix speculum, pietatis exemplar, assertorem veritatis, Cleri ordinatorem, Pastorem plebis, miserorum spem, tutorem pupillorum, viduarum vindicem, cœcorum oculum, baculum senum, malorum metum, gloriam bonorum, virgam potentium, Patriæ lumen, omnibus omnia: vt melliflui Doctoris vsurpem verba. **Facies ILLVSTRISIME DOMINE**, nec patieris cunctos de-

nio errore duci. Quidquid prauum erit, corriges; quidquid asperum, lenies; quidquid durum, molles; quidquid distortum, emendabis; quidquid moestum, recreabis; quidquid languidum, sanabis; quidquid imperfectum, perficies; neque patieris vnquam Te Pastore, Te Principe, Te Præside; vel consilia bona traduci, vel res optimas, corruptis moribus deprauari. Interea, cum omnes alios, ad Tui Ingressus festiuitatem celebrandam prouocas, nos quoque, qui hoc primum in Septemtrione, & vnicum virtutis, literarumq; incolimus domicilium, iube optima quæq; expectare. Nullum est magno Heroi, & immortalitatem merituro Principi, genus beneficij dignius; quam quod erogatur ad literas tuendas, & conseruandas. Potentissimorum Regum, maximorum Principum, præcipua laus ista fuit, Musas, Musarumq; cultores, à fortunæ furore, atq; inopiâ defendere, mollissimamq; illis tranquillitatem, tutas ac beatas sedes commodare. Vt cum nomen suum, ad orbis memoriam propagassent immortalem: gratâ quoque literarum memoriâ, & præstantissimis in earum salute, & integritate amplificandâ meritis, ad omnem posteritatem illustrari, commendariq; pulcherrium sibi iudicâint. Eorum in Te Princeps Optime, cum perfectissimè omnimoda similitudo transierit; etiam patrocinium repræsentet literarum. Suscipe curam Tuæ Academiæ, Cancellarie Fauentissime: pro Tuâq; insigni sapientiâ, non solum, ne violata integritas legum nostrarum, detrimento afficiat Rempublicam, vide: sed præterea, vt iudicio Tuo probata, recreata testimonio, ornata laude, & gratiâ Tuâ, quàm diutissimè floreat prouide. Aboleri non poterit tanta Virtus, vigeat & splendescet clarissimè, nullis obruenda temporibus, non statuis expressa, aut saxi incisa vetustate fluentibus: non commendatione ceræ, aut vanis pigmentorum efficta fucis; sed viuido eloquentiæ succo; sed duraturis nobilium ingeniorum monumentis, cedro melius, atque Ægyptio bitumine, contra omnes casus, & voracem temporum gulam munietur. Vt cum satis naturæ, satis Ecclesiæ, satis omnibus bonis, æuum, ætatemq; Tuam produxeris, & feliciter ab hac mortali concretionem segregatus, desertis rebus humanis, ad Superos recesseris, è sublimi fastigio, in ipso æternitatis Capitolio, posteritati longissimè secuturæ, magis augustus, magis emineas gloriosus.

D I X I.



Sumptibus ex fundatione Generosi Domini
Bartholomæi Nowodworiski, S. Ioannis
Hierosol: Equitis Meliten. Commenda-
toris Posnanien. olim S.R. M.
Aulici.





